







遜國臣記叙

高皇親賢好士砥礪英豪雖戡亂  
而冰霜雨露實均造物之心天

文繩武敬體益敦人重名節士惜廉耻試觀革  
除遺事當時死義之臣何多考書契以來未有  
盛於此者也

文皇仗義周公師陳江上金川不守本

高皇帝親嫡子豈易姓比况英毅豁達遠邁建文  
使智如管仲以忠

高皇者忠





文皇他日齊名楊蹇亦無不可胡乃其飴於赴鼎  
取適於捐生宗嗣奄滅而守不移朋屬旣殲而  
心不動精金以百鍊益勁長河雖萬折必東壯  
烈泣鬼神血誠貫天日方陳暴鐵之節尤爲皎  
皎而周景諸公相時委曲終完大義他若知名  
無考有迹無名者不可勝數又寧無名迹俱泯  
詩不見於蛾眉幾豫決於色舉者乎蓋自推戴  
留名外人人苟息豫讓矣此其浩然天植夫豈  
聞彼伯夷古稱商家一代之人心風俗臣竊謂  
高皇作人之化更爲過之書曰旣歷三紀世變風

移

高皇變夷爲華誕敷文德茲方三紀而養士之報  
若此自是以後四十八年乃有巳巳之變去戊  
申八十餘年德教愈深宜有文丞相李侍郎者  
光我中華盛於建文可也於時死綏授命之士  
寂無聞焉豈人不古若遽大相異乃爾耶夫平  
時危言潔行與臨難抗節死忠其致一也巳巳  
以來又百二十年廷臣危言潔行固多可表求  
其格心善俗歷歷如漢長孺唐韓休宋田錫歐  
陽修者殊未易得卽得之未安於位也度之濟



難槩可知矣嗚呼人才關氣運之盛衰士氣係  
人才之隆替翁故詳遜國諸臣以附名臣不惟  
彼之不可泯亦見此之不可忽有風教之責者  
庶其感動於斯也時

嘉靖丙寅初秋朔進士鄭履淳謹叙

建文遜國臣記目錄

第一卷

魏國公徐輝祖

文學博士方孝孺

兵部尚書齊太

太常卿黃子澄

刑部侍郎張昺

按察僉事湯宗

燕府長史葛誠

燕府伴讀余逢辰

兵部尚書鐵鉉

吏部尚書張統

禮部尚書陳迪

刑部尚書侯太

刑部尚書暴昭

第二卷



都指揮謝貴

都指揮彭二

都指揮馬宣

都指揮朱鑑

大寧守將卜萬

都督廖鏞

都督孫岳

都指揮瞿能

都指揮宋忠

都指揮余瑱

都指揮彭聚

都指揮孫太

都指揮莊得

都指揮陳質

都指揮楚智

都指揮阜旗張

指揮王資

指揮崇剛

指揮趙諒

指揮宋瑄

指揮張倫

衛鎮撫曾濬

衛鎮撫楊本

千戶倪諒

所鎮撫周拱元

第三卷

禮部侍中黃觀

吏部侍郎毛太

戶部侍郎卓敬

戶部侍郎盧迴

戶部侍郎郭任

禮部侍郎黃魁

兵部侍郎陳植

兵部侍郎徐屋

刑部侍郎胡子昭

御史大夫練子寧

御史大夫景清

都御史茅大芳



都御史陳性善

大理少卿胡閏

太常少卿盧原質

太常少卿廖昇

大理寺丞鄒瑾

大理寺丞劉端

大理寺丞彭與明

左拾遺戴德彝

第四卷

開國公常昇

越雋侯俞通淵

駙馬都尉梅殷

長興侯耿炳文

駙馬都尉耿璿

灤城侯李堅

安陸侯吳傑

歷城侯盛庸

江陰侯吳高

都督耿璿

都督劉貞

都督趙清

都督楊文

都督徐凱

第五卷

翰林修撰王叔英

翰林編修王良

翰林編修程濟

衡府紀善周是修

給事中陳繼之

給事中韓永

給事中黃鉞

給事中龔太

監察御史曾鳳韶

監察御史董備

監察御史葉希賢

監察御史魏冕

監察御史王度

監察御史甘霖



監察御史高翔

監察御史王彬

監察御史鄭公智

監察御史韓郁

叅軍斷事高巍

行軍斷事錢芹

戶部主事巨敬

國子博士黃彥清

宗人經歷宋徵

欽天監副劉伯完

按察使王良

叅政鄭居貞

按察副使程本立

按察僉事胡子義

按察僉事林嘉猷

知府葉惠仲

知府王璉

知府姚善

知府徐安

知府黃希范

知府孫鎮

知府陳彥回

谷府長史劉璟

遼府長史程通

知州蔡運

知縣顏伯瑋

知縣鄭恕

理問徐讓

縣丞劉亨

縣丞衛健

教授陳思賢

教諭王省

主簿唐子清

吏目鄭華

典史周縉

典史黃謙

盧振

牛景先

周璿

謝昇



龔翊

儲福

松江同知

舉人劉政

生員高賢寧

第六卷

某部郎中梁田玉

中書舍人梁良玉

中書舍人何申

中書舍人宋和

中書舍人郭節

梁良用

梁中節

何洲

郭良

雪庵和尚

河西傭

川中補鍋匠

馮翁

東湖樵夫

第七卷

戶部尚書王鈍

工部尚書嚴震直

侍郎學士王景

侍郎學士董倫

大理少卿薛崑

少卿學士高遜志

國子祭酒張顯宗

侍講學士王達

翰林侍讀唐愚士

翰林侍講樓璉

翰林侍書宋懌

尚寶司丞李得成

監察御史尹昌隆

國子博士王紳子稔

按察僉事葉砥

知府劉有年



典史魏澤

衛卒羅義

第八卷

都督平安

都督竇忠

都督潘忠

都督袁宇

都督楊松

都督馬溥

都督陳暉

都指揮房昭

都指揮唐禮

都指揮孫狗皮

都指揮葛進

太監吳亮

建文遜國臣記目錄終

建文遜國臣記第一卷

吾學編第五十二

海鹽鄭曉

文皇即位之歲八月得建文時羣臣封事千通命  
解縉等檢閱凡言兵食事宜者留覽其詞涉干犯  
者悉焚不問

建文四年十一月都御史陳瑛請治建文諸死事  
臣 文皇曰彼食其祿自盡其心爾勿問又曰諸  
臣盡忠于 太祖故盡忠於建文但惡其導誘建  
文變亂成法耳

永樂十一年正月勅法司解建文諸臣禁令



十四年諭法司奸惡齊黃等遠親未拿者悉宥來告者勿理

二十一年十一月劄諭禮部尚書呂震盡赦諸死義家於是稍稍有言建文時事者諸死義家人亦稍復還廬里

吉水人劫錢習禮爲練子寧姻爲讐家所持習禮惶急楊榮爲白 上上欣然曰使練子寧在朕固當用之况習禮乎

仁宗卽位之歲十一月劄諭禮部尚書呂震曰建文中奸臣正犯悉受顯戮其家屬初發教坊司錦

衣衛浣衣局習匠功臣家奴今有存者旣經大赦並宥爲民給還田土

洪熙元年 仁宗撰長陵碑文稱建文君雖追廢猶書其沒曰崩當其在位猶尊之曰朝廷又諭羣臣曰若方孝孺輩皆忠臣詔從寬典於是天下始敢稱孝孺諸死義爲忠臣云

睿皇復辟之年釋建庶人吳庶人繫令自便吏部侍郎楊守陳曰國可滅史不可滅我 太祖定天下卽命儒臣撰元史靖難後史臣不紀建文君事遂使建文數年朝廷政事及當時忠於所事



者湮沒不傳及今采輯尚可補國史之缺草奏欲  
上以病不果

南京吏部侍郎儲瓘曰方正學一時諸公必不可  
泯又曰永樂初節行之士尤見志尚所在某不自  
揆念其忠於所事嘗欲蒐其遺事稍發其潛

弘治中台人繆恭學古行高晚年走京師上六事  
其一紀絕屬請封建庶人後爲王奉祀懿文太子  
通政司官見恭奏大駭罵恭蠻子何爲自速死繫  
恭兵馬司獄劾上待命賴 敬皇明聖詔勿罪放  
恭還鄉

弘治中給事中金谿吳世忠請表祠方孝孺周是  
修練子寧黃子澄鄒瑾魏冕顏伯瑋齊太諸死義  
者

嘉靖十四年給事中雲南楊傑請表揚建文諸忠  
臣下禮部議議未上 今皇帝因召對禮官問曰  
昨給事中言建文諸臣事云何夏言對曰諸臣誤  
君亂國先朝誅殛豈宜褒錄 今皇帝色變曰言  
官得無誚朕言對曰言官本書生初入仕聞人言  
建文諸臣死事時甚烈以故輒爲陳說耳 今皇  
帝色霽明日上議亦不罪僕



魏國公徐輝祖

徐輝祖中山王長子初名允恭 太祖賜名輝祖  
身長八尺五寸洪武二十一年嗣魏國公二十六  
年遣諭北平防胡明年練浙江海上兵防倭二十  
九年會禮部翰林院試國子師生第優劣移吏部  
錄用輝祖嘗侍 懿文太子學通經書大義從詹  
希元學書善大字戊寅閏五月建文君即位特見  
信任八月兼太子太傅靖難兵起與齊黃盧振張  
昺葛誠通謀議督諸兵北進屢有功召還靖難兵  
至江上輝祖及開國公常昇分道出師禦戰將士

往往離散不肯向敵遂還京 文皇即位勒罷尋  
幽繫永樂五年輝祖卒年四十 上曰輝祖與齊  
太輩罪同宜論死朕念中山王平定天下有大功  
於國家曲赦輝祖今輝祖病死中山王功不可無  
後令輝祖子嗣魏國公通給中山王歿後祿輝祖  
長子釋迦保見 上賜名欽嗣魏國公遂乞守墓  
上怒謫居中都二十二年卒中山王四子次添福  
增壽緒長女 文皇后次代王妃次安王妃增壽  
素通款於北平壬午秋靖難兵入金川門建文君  
手刃增壽於左順門廡下是年贈謚武陽忠愍侯



永樂二年贈定國公子景昌嗣

文學博士方孝孺

方孝孺字希直一字希古台寧海人父克勤元末  
隱居國初守濟寧有惠政孝孺幼精敏絕倫雙眸  
炯炯日讀書積寸爲文雄邁醇深鄉人呼爲小韓  
子年十四五侍父宦遊齊魯間歷覽孔子周公廟  
宅問陋巷舞雩所在從宋濂游同門多天下名士  
一旦盡出其下先輩如胡翰蘇伯衡皆自謂弗如  
孝孺顧末視文藝恒以明王道闢異端爲已任進  
修所詣月異而歲不同世咸以爲程朱復出嘗臥

病絕糧家人以告笑曰古人三旬九食窮豈獨我  
哉洪武十五年以吳沉揭樞薦召見 上喜其舉

動端整謂皇孫曰此莊士當老其才輔汝遣還鄉  
會仇家得罪詞連孝孺籍其家械送闕下 上識

孝孺名特開釋令奉祖母挈妻子還二十五年又  
薦召至 上曰今非用孝孺時稍擢漢中府學教  
授日與諸生講明聖學蜀獻王聞其賢聘爲世子  
師孝孺每見必陳說道德王喜甚講經論文無虛  
日爲名其讀書之廬曰正學皇太孫即位初廷臣  
交薦召爲翰林博士進侍講尋陞侍講學士暨董



倫侍經筵備顧問孝孺德望素隆一時倚重凡將相大政議輒咨孝孺上好讀書每有疑即召使講解臨朝奏事臣僚面議可否必命孝孺就辰前批答孝孺嘗作書事詩曰斧辰臨軒几硯間春風和氣滿龍顏細聽天語揮毫久携得香煙兩袖還又曰風軟彤庭尚薄寒御爐香遶玉闌干黃門忽報文淵閣天子看書召講官時大召名儒修太祖實錄及類要諸書孝孺爲總裁會改謹身殿名正心孝孺獻銘作凝命神寶孝孺又獻頌皆規正君德比定官制改孝孺爲文學博士靖難兵起目

召謀議詔檄皆出孝孺手兵旣渡淮及江上畫策堅守誓死社稷建文君遜去文皇以姚廣孝言召用孝孺不肯屈繫獄一日遣人諭再三終不從又召孝孺草詔及見悲慟徹殿陛上降榻勞曰先生無自苦余欲法周公輔成王耳孝孺曰成王今安在文皇曰渠自焚死孝孺曰成王即不存何不立成王之子文皇曰國賴長君孝孺曰何不立成王之弟文皇又曰先生無過勞苦置左右授筆札又曰詔天下非先生草不可孝孺大批數字云云投筆於地又大哭且罵且哭曰死即死



詔不可草 文皇大怒命磔諸市孝孺慨然就戮  
爲絕命詞曰天降亂離兮孰知其由奸臣得計兮  
謀國用猶忠臣發憤兮血淚交流以此狗君兮抑  
又何求嗚呼哀哉庶不我尤時年四十六復詔收  
其妻鄭鄭先已經死宗族坐死者八百七十三人  
孝孺和粹貞諒事親孝處師友篤恩義克勤守濟  
寧被誣謫戍江浦上書乞以身代父不報宋濂葬  
夔州孝孺自漢中走荆榛往祭奠且言之蜀王軫  
恤其孤嫠備至與林右王紳郭濬劉浩葉見太諸  
名士友善切磨道義被薦時王叔英與書大率以

時措之宜爲言孝孺深然之及與政又輒慕古王  
政即欲見諸行事以故多紛更卒無成效其文章  
大類蘇氏而正論過之嘗謂道之於事無乎不在  
列爲二十八箴又作雜誠三十八章以自警謂化  
民必自正家始作宗儀九篇謂先王之治先德化  
而後政刑作深慮論十首以篡臣女主夷狄雖一  
天下不可爲正統作釋統三篇多先哲所未發者  
四方夷裔得一字寶於金壁所著有遜志齋集四  
十卷又有周禮考次大易枝辭武王戒書註帝王  
基命錄文統宋史要言諸書逸不傳洪熙初 仁



廟嘗謂羣臣曰若孝孺輩皆忠臣詔奸臣黨與從寬典方氏遺族始有赦還鄉者因立祠堂祀孝孺成化初遺文始行或曰錄孝孺家時得魏典史澤周旋藏其幼子以故孝孺尚有後謝文肅公詩所謂孫枝一葉是君恩也孝孺死節事至今百六十年人皆歷歷能言雖人人殊其成仁取義之死靡悔斷然不可泯滅而同時文學柄用之臣際會功名史有別書以故彭惠安公澤哀江南詞有曰後來奸佞儒巧言自粉飾叩頭乞餘生無乃非直筆澤字彥恩應天人爲刑部尚書謫寧海

### 兵部尚書齊太

齊太溧水人初名德洪武二十年鄉貢明年舉進士歷禮兵部主事會震謹身殿上禱郊廟太以官九年無過得陪祀賜名太三十年陞兵部左侍郎明年進本部尚書上嘗召太問邊將姓名太歷數無遺又問諸圖籍太出袖中手冊進簡要詳密上大竒太是年閏五月受顧命輔皇太孫時諸王皆尊屬擁重兵專制地嫌勢逼詔諸王臨邸中毋奔喪王國所在吏民悉聽朝廷節制詔下諸王不說謂此齊尚書踈間我也嘗使北平北平賂



進國目言 卷之一  
三百六十八  
太太受歸請爲兵費 上益倚重太 文皇時自  
燕邸入臨至淮安太言 上急出勅符勒歸國又  
與太常卿黃子澄建策凡親王有罪輒除國建文  
元年靖難兵起太專主籌畫命將出師 上日召  
學士輩討論周官法度處便殿弄柔翰詔聞外事  
一付太太遂移檄指斥削屬籍或難之太怒曰名  
正言順敵乃可服靖難兵遂以誅太爲名上疏請  
發奸臣齊太黃子澄等與臣訊究陛下卽不發臣  
必不休兵且抵京赤地千里時尚遣諸王督監諸  
軍太以谷王穗漏師遁還慮遼寧二王近燕爲變

皆召之還遼王至寧王竟不至二年靖難兵日進  
逼淮泗謫太子澄官求解兵李景隆書于燕謂齊  
黃屏竄遐荒可息兵歸藩不聽進兵益急尋召太  
未及還金川門開建文君遜去太追至廣德欲往  
他郡起兵興復竟被執見 文皇不屈死之從兄  
弟敬宗等皆死叔時永陽彥等謫戍兒甫六歲給  
配赦還今其子孫猶存故居爲舖舍人猶稱尚書  
舖云 仁宗爲長陵神功聖德碑述建文君焚崩  
喪以天子禮臣僚非其罪者咸復之於是太等宗  
黨皆得赦給還田土且戒天下毋得以奸黨相告



許云嘉靖中知縣謝廷蒞爲祠祀太嘉靖己酉予  
至溧水造太祠見其五世孫光裕卽六歲兒後也

### 太常卿黃子澄

黃子澄名湜以字行分宜人少受易歐陽貞書周  
與學春秋梁寅有文行負盛名洪武十七年貢入  
太學明年進士舉禮部第一授翰林編修陞修撰  
伴讀東宮累官至太常卿建文君爲太孫時坐東  
角門謂子澄曰諸王尊屬擁重兵奈何對曰諸王  
僅有護兵纔足自守萬一有變以六師臨之誰其  
能支漢七國非不强卒底亡滅小大强弱之勢不

同而順逆之理異也太孫喜每呼子澄黃先生太  
孫卽位倚任子澄謂曰先生無忘東角門之言子  
澄頓首應曰不敢遂出與齊太議削奪諸王兵權  
未幾周王得罪建文君書諭 文皇文皇爲曲解  
子澄曰燕周母兄弟燕王出塞有功威名日盛不  
併去燕後難圖於是出兵開平諸鎮及更置北平  
守臣伺府中事日急靖難兵遂起及耿炳文諸將  
相繼敗北建文君召問子澄對曰勝負兵家常事  
今天下富盛兵强食足區區一隅豈能當天下全  
力聚兵五十萬四面並進旦夕且成擒子澄遂薦



李景隆爲大將代炳文景隆尤昏懦戰輒敗棄其師遁召還京又赦不誅子澄慟哭曰景隆出師觀望懷二心不亟誅何以謝 祖宗厲將士練子寧亦執景隆於朝且哭且數請誅之皆不聽江淮諸將連敗子澄拊膺慟哭曰大事去矣誤薦景隆萬死不足贖誤國之罪賦詩云仗鉞曾登大將壇貂裘遠賜朔方寒出師無律真兒戲負國全身獨汝安論將每時悲趙括攘夷何日日見齊桓尚方有劍憑誰借哭向蒼天幾墮冠靖難兵至淮上建文君不得已逐子澄且密使募兵而以竄齊黃使告燕

文皇曰此緩我也請悉召吳傑平安盛庸師還即已建文君爲遣少卿薛嵒請罷兵 文皇又不許兵抵江干蘇州知府姚善言子澄文武才畧足捍國難顧屏諸閑遠以快敵人胡失計至此始急召子澄未至金川門失守 文皇執子澄責問不服族其家一子走易姓名田經遇赦家湖廣咸寧正德辛巳進士黃表其後也

刑部侍郎張昺

張昺澤州人洪武中舉人才累官刑部侍郎二十八年四月轉左建文君初即位諸大臣言藩王周



代岷谷湘相繼變告藩國所在宜簡精強謀略有  
威望者爲守臣彈壓昂出掌北平布政司事與謝  
貴並受密命未幾詔讓 文皇昂貴遂集兵部署  
守王城 文皇亦稱疾不出長史葛誠謂昂王無  
恙昂不信張玉朱能請 文皇起兵 文皇曰昂  
貴已先發非計擒二人不可建文元年七月六日  
會朝廷遣人逮府中官校 文皇盡縛官校置庭  
中召昂貴入與械去昂以爲 文皇見兵大集窘  
不得已縛府中人獻朝廷不妄防守遂懈二人入  
至端禮門內伏兵起縛二人 文皇擲杖起立曰

我何病爲爾輩所迫耳昂不服死之屍得還葬昂  
初至北平以吏李友直機警寄心腹令訶府中事  
友直輒先事泄昂謀以故府中得爲備昂死友直  
遂得爲北平叅議靖難後族昂家焚殺近戚程亨  
輩戚疎遠及里人並戍邊一子得避脫 文皇嘗  
夢昂被髮爲厲出焚其尸面色如生昂家上祖墳  
在水南正德十五年知州馬汝驥立祠祀之汝驥  
有行誼官至禮部侍郎謚文簡

### 按察僉事湯宗

湯宗未詳何許人爲北平按察僉事上言北平按



察使陳瑛密受王府金錢有異謀逮瑛謫廣西靖  
難後瑛召還院窮治建文諸臣多坐夷滅恨宗亦  
論死

燕府長史葛誠

葛誠未詳何許人爲燕府長史靖難兵未起誠與  
張昺謝貴言府中事又嘗諫 文皇文皇稱病暑  
月圍火輒言寒三司官入問疾誠密告昺王非病  
以不得 上心故誠又密疏聞 上會燕人奏事  
京師遂執下獄得密謀踪跡即發符逮府官校又  
令貴昺發兵內應盡簿錄王府人 文皇大恨殺

其家

燕府伴讀余逢辰

余逢辰字彥章宣城人爲燕府教授陞伴讀靖難  
兵未起逢辰頗聞其謀遺書戒其子自分必死起  
兵時逢辰泣諫死之

兵部尚書鐵鉉

鐵鉉鄧州人洪武中國子生授禮科給事中調五  
軍斷事奏對詳明 上喜賜字鼎石藩府坐法刑  
官久鞫不能奏當 上屬鉉立決 上益喜凡兩  
法司疑獄盡屬鉉未幾陞山東叅政建文二年李



景隆駐德州鉉督餉飛芻挽粟水陸並進軍興不  
乏五月靖難兵圍濟南甚急鉉暨徐將軍盛統兵  
高僉憲宋叅軍張都統王太守王府校等悉力防  
禦令軍民詐降開城門候 文皇入急下鐵板幾  
中比出戰令軍士噪罵 文皇窘大怒攻至秋七  
月不能克舍之南去宋叅軍說鉉等曰濟南天下  
之中北兵今南去其留守北平者類老弱且永平  
保定雖叛諸郡縣堅守者寔多郭布政輩書生大  
叅公能出奇兵陸行抵真定南朝諸將潰逸者稍  
稍收合不數日可至北平其間豪傑有聞義而起

者大叅公便宜署部號召招徠之北平可破也北  
平破北兵回顧家室必散歸徐沛間素稱驍勇大  
叅公檄諸守臣倡集義勇候北兵歸合南兵征進  
者晝夜躡之大叅公館穀北平休養士馬迎其至  
擊之彼背腹受敵大難旦夕平耳鉉以軍餉盡於  
德州城守三月士卒困甚而南將皆駑材無足恃  
莫若固守濟南牽北兵使江淮有備北兵不能越  
淮歸必道濟吾邀而擊之以逸待勞全勝計也乃  
設宴天心水百亭犒問辛苦述賦賡歌激發忠義  
未幾又有東昌之捷建文君以却敵之賞賞鉉進



布政使再陞兵部尚書叅盛庸軍務賜金幣誥命  
封三代鉉入謝京師賜宴饋粟肉小河之捷中原  
震動 文皇欲北還以諸將言再戰得勝遂長驅  
渡江鉉感憤欲自裁 文皇登極鉉尚擁殘兵駐  
淮南已而擒鉉至不肯屈令一顧終不可得割其  
耳鼻竟不肯顧劈碎其體至死罵不絕聲時年三  
十七子福安戍河池康安先卒父仲名年八十三  
毋薛安置海南

吏部尚書張統

張統字昭季富平人父月川文行知名統洪武中

舉通經爲東宮侍書才識通敏太子器重統洪武  
十二年冬陞通政司左叅議試左通政十五年雲  
南平出爲右叅政陞辭 上賦詩二章賜統歷進  
左布政使凡土地貢賦法令條格祠祀公廨上下  
典儀經費程度悉統裁定夷民孚說遠邇莫安是  
時雲南寓賢董倫王景韓宜可輩不問識不識皆  
厚恤之以故遷謫至者如歸二十六年三月秩滿  
入覲治行爲天下第一特令吏部勿考賜璽書曰  
曩者討平西南夷命官撫守爾統實先往任今五  
年言出則諸夷聽服令布則四野懽忻皆由誠信



相孚克共乃職今年來朝不待考而朕知其功出乎天下十二牧之首故嘉汝績復命仍治黔南汝往欽哉賜宴及道里費三十一年召爲吏部尚書滇人如失父母時建文旁求遺逸日集闕下率命統試鑑識精絕各當其材會修太祖實錄被旨試翰林編纂官考第高下統得楊士奇策喜曰明達時務有用之才不但文辭之工也奏第一授王府審理副靖難後召統及戶部尚書王鈿諭曰卿二人久事皇考習知典故今皆老矣其解職務月給尚書半俸居京師視時政有戾舊制者直告

朕無隱庶稱厚望老成之意統出遂自經吏部後堂死統嘗爲雲南公廨記曰公廨廣三十七丈袤百丈有奇段氏時稱東府元爲行省皇明底綏萬方以洪武壬戌戡定雲南就置布政使司屋宇階庭雖有成績較之華夏則規模差陋惟堂與寢其製頗精緻旋榮累節軒翔峻起但歷歲已久柱傾直漏者屢矣周廡之外儀以重門功緒甚略意精者其舊貫而粗者元之改作也東埂左右司以下西埂管勾廳以下屬寺悉附焉統備員以來旋拒烏合之徒內訌而外叛兵旣未休饑疫隨之日



不暇給者凡五年歲丙寅始克儲材明年冬撤其  
堂而新之正六楹楹圍五尺棟九架而衍其前脊  
高四尋簷殺脊之半以強越二年再治材且因且  
革門寢暨經歷司始成其外門兩廊仍未易也初  
令有司計木之數與巨細若戶力之盈朒差而賦  
之轉致不立期一從其便其興徒也較四州十一  
縣夫之壯者每一州縣均作三四番每番期十日  
乍作乍輟不敢妨其務不敢竭其力遷就數踰年  
而迄未畢工如是乎其艱且滯者何哉蓋兵民之  
役有征有屯有築有餉其大者如此其小者未可

枚舉故不得已爲是迂拙之政誠不忍更促之也  
竊嘗論之雲南於古爲荒外不治之地山林幽阻  
民俗草昧各種各部如蜂蟻然無教令等威之制  
無宮室服用器業之資生理旣不足繫其心又奇  
險可以容惡是以樂縱恣而安悖亂苟束之以法  
而強之以不能彼不信然相噬則缺然而長往矣  
昔在漢晉雖嘗設官亦卽其要會而領之隋唐間  
頗置州郡皆不過羈縻而已固未嘗如中國間井  
其人也元以四夷氣類相近因而撫之爲宜然其  
弗靖者猶爾也是以志烈之士非不欲草薶而禽



獮之顧其勢有所不行亦噤斷久之乃已徐而思之有如耐飢渴習霧露乘高走險殊死而不顧者乃其所長然而性多荒惰暗事機素無節制之可守雖則易合亦復易離智者察此則知所以制之矣必有人焉才兼文武而道濟方域曰德曰威曰廉曰信兼此四者而事不定人不安吾不信也故當無事則宜佚蕩簡易寬小過守大綱如班定遠之言或有蠱賊則乘其未滋霆衝電激指的而中之以懲其餘斯亦攻心伐謀之大端夫如是良怖急者可牀下伏矣敬告來哲誠不知所以裁之洪

武二十二年庚午閏四月十有八日

禮部尚書陳迪

陳迪字景道宣城人曾祖巨卿元江州路總管祖宥賢國初從征有功調撫州守禦百戶因家焉父仲康嗣百戶迪幼倜儻有志操洪武八年薦辟爲郡學訓導嘗爲郡草萬壽賀表 上覽而異之十二年近臣薦召爲翰林編修十八年陞侍講預修大典二十四年陞山東左叅政捕蝗弭盜民德之二十七年內艱二十八年陞雲南右布政使時普定曲靖烏撒烏蒙諸夷煽亂迪率土兵擊破之捷



聞賜金幣二十一年建文君即位改官制定六部  
一品免尚書鄭沂等徵迪爲禮部尚書建文二年  
知貢舉是年水旱有旨集議迪言刑獄未清宜勅  
法司擇公廉仁厚者分詣郡縣審覈獄囚無令久  
淹致傷和氣又言逃民家業旣喪且畏公私逋負  
失今不卹必嘯聚爲患宜使有司招徠其不願歸  
者聽附籍種田暫免差役則民安而盜息矣皆從  
之三年加太子少師辭兼俸靖難兵起與黃子澄  
等上疏陳大計迪受命督軍儲於外過家未嘗入  
聞變卽赴京師 文皇繼統召迪責問迪慢罵不

屈與子鳳山丹山等六人同日就戮將刑鳳山呼  
曰父累我迪叱勿言罵不絕口割鳳山等鼻舌熬  
熟食迪吐唾益指斥遂俱凌遲死旣死人于衣  
帶中得詩有曰三受天王顧命新山河帶礪此絲  
綸千秋公論明於日照徹區區不貳心又有五噫  
詞並悲烈蒼頭侯來保者拾其遺骸歸葬縣計家  
橋洪熙初詔釋迪宗姻戍邊者還鄉給產業成化  
壬寅郡人祀諸鄉賢祠甲辰郡守涂觀復於迪故  
居立祠祀之後湮廢嘉靖乙未驗封郎中李默謫  
判寧國復置祠祀郡人私謚曰靖獻默文學才行



表著一時仕至吏部尚書兼翰林學士丙辰春爲趙文華所誣逮詔獄卒

刑部尚書侯太

侯太南和人累官至刑部尚書靖難兵起太督餉山東濟寧不守輜船陷沒還京建文四年又出淮安總軍餉得便宜行事 文皇即位太至高郵與其隸上高茅卯仔同執下錦衣獄是年七月死第敬祖子玘皆論死籍其家幼子京兒永樂九年尚繫錦衣獄

刑部尚書暴昭

暴昭山西人爲北平叅政時防藩府甚嚴未幾遷刑部侍郎克北平採訪使甫至境聞變亟走歸聞上建文元年設平燕布政司於真定陞昭刑部尚書掌司事平安諸兵敗召歸京師靖難兵入城出亡被執見 成祖抗罵不屈去齒截手足罵不絕口至斷頸乃已

建文遜國臣紀第一卷

子履準校

孫心材重校



建文遜國臣記第二卷

吾學編第五十三

海鹽鄭曉

都指揮謝貴

謝貴未詳始所自起洪武二十五年以錦衣指揮僉事陞河南都指揮僉事未幾署山西行都司事二十八年坐趙隆事法當死 上特宥貴降河南衛指揮僉事建文君即位疑北平兵部尚書齊太薦貴智勇以爲北平都指揮使俾覘藩府令其練兵卽有變先發後聞巳卯六月貴部署北平七衛兵布城中逼王城盡柵端禮四門 文皇用張玉



朱能計先擒貴貴死兵盡散玉等遂奪北平九門

### 都指揮彭二

彭二亦未詳始所自起建文初爲北平都指揮有威名靖難兵起殺謝貴二急跨馬大呼市中集兵得千餘人欲入端禮門文皇遣健卒龐來興丁勝格殺二兵亦散

### 都指揮馬宣

馬宣北平都指揮使靖難兵起殺張昺謝貴宣巷戰不勝東走薊州起兵西逆戰遇靖難兵戰不利退守薊州出城再戰又敗被執罵不絕口死之建

### 文君褒恤宣家

#### 都指揮朱鑑

朱鑑北平行都司都指揮守大寧靖難兵至大寧諸將陳亨房寬皆降鑑力戰不支被縛罵不絕口死之建文君加卹典文皇檄中所謂萬段凌遲處死者卽鑑也

### 大寧守將卜萬

卜萬大寧大將也謀勇自負效死無恨每戰輒先登靖難兵畏萬萬部將陳亨欲降燕畏萬不敢發文皇貽萬書盛稱萬極詆毀亨緘識牢密召所獲



大寧卒解縛厚賞之置書衣中俾歸密與萬故使同獲卒見之怪問守者曰彼何為得此守者曰遣歸通密書於卜都司以故得厚賞卒跪告守者曰我得偕行請惟命無庸賞我守者為請得俱遣竟不與賞不得賞者大恚至即發其事劉貞陳亨搜卒衣得與萬書遂疑萬執下獄籍其家其間吳高亦類此未幾亨竟降貞遁遼東大寧相繼不守矣今寧陽侯者即亨後也

都督廖鏞

廖鏞巢人祖永忠開國功封德慶侯父權嗣封鏞

以適子任散騎舍人歷官至都督建文中與議兵事時宿衛殿庭靖難後上以廖侯兩子鏞與銘嘗受學方孝孺令召之孝孺怒曰汝讀幾年書還不識箇是字兩子復命上怒令軍校收孝孺孝孺杖衰絰至闕下大哭上益怒令以刀抉其口兩旁至耳刑之聚寶門外凡七日罵聲不絕廖兩子拾遺骸葬聚寶門外山上甫畢廖氏亦見收兩子遂逃去永樂元年四月錦衣鎮撫司奏獲鏞銘送刑部論死鏞弟鉞及從父淮安指揮僉事俱謫戍邊鏞母東甌王長女也并銘女送浣衣局



都督孫岳

孫岳洪武中從大將立功官至都督同知建文中充鳳陽守將靖難兵起大修戰守器械撤寺材爲戰艦樓櫓戈甲咸有法列寨淮西水陸有備靖難兵竟從下流渡淮至盱眙金川門不守尚猶堅守中都永樂元年法司劾岳逮至京宥死安置海南

都指揮瞿能

瞿能不知何許人驍勇有名洪武中以四川都指揮使與同知徐凱統兵從涼國公渡大渡河擊西番有功又與都督徐司馬爲副總兵從總兵都督

聶緯討建昌叛酋月魯帖木兒已而改副涼國公藍玉能破賊雙狼塞建文君即位從李景隆爲裨將二年四月庚申戰敗白溝河諸將皆狼狽走能父子獨力戰死之精兵萬餘人皆死或曰能通之子也

都指揮宋忠

宋忠錦衣衛指揮使智勇有名洪武二十九年百戶有論死者非其罪也忠疏救百戶御史劾忠上曰忠率直無隱爲人請命何罪爲并宥百戶戍邊三十年御史劉觀劾忠作威福邀名譽調鳳陽



中衛明年平羌將軍都指揮齊讓討西夷無功以忠爲叅將從征虜前將軍楊文討之凱旋復官錦衣視傳道四川建文元年三月勅忠以都指揮總邊兵三萬屯開平盡簡燕府護衛壯士從忠聽忠節制護衛胡騎指揮關童者素驍勇忠遣童入京北平有永清左右衛左調屯彰德右屯順德都督徐凱屯臨清耿璫屯山海與忠相犄角約北平藩闡張昺謝貴長史葛誠爲內應 文皇殺昺貴誠起兵忠率兵三萬至居庸關不敢進退保懷來 文皇曰宋忠握兵懷來必爭居庸宜乘其未至擊

之遂率精兵八千卷甲倍道趨懷來獲諜言忠謂諸將士家在北平者並爲燕府誅滅盍努力復家讐報國恩 文皇急令其家人張故旗幟爲先鋒呼其父兄子弟相問勞家無恙輒喜罵宋都督欺我倒戈走忠倉卒列陣未成 文皇一麾渡河大戰敗奔入城被執死之子謙鎮南衛指揮使靖難後謫戍邊年十六賜死

### 都指揮余瑱

余瑱北平都指揮使與謝貴密謀不遂貴死瑱走居庸關宋忠承制令瑱守關瑱簡練關卒得數千



人將進攻北平 文皇曰居庸險隘北平之咽喉  
我得此可無北顧憂瑱若據此拊我背宜急取緩  
則增兵繕守後難圖矣令指揮徐安鍾祥千戶徐  
祥等擊瑱瑱且守且戰援兵不至棄關走懷來依  
忠忠兵又敗同被執不屈死之

都指揮彭聚

彭聚北平都指揮也與孫太副宋忠守懷來忠敗  
聚力戰死當是時諸將校爲靖難兵所俘者百餘  
人皆不肯降發憤死大半不可考矣

都指揮孫太

孫太都指揮使從宋忠戰懷來先登頗有斬獲靖  
難兵擇善射者並射太中矢流血被甲慷慨裹血  
力戰奮呼陷陣死之

都指揮莊得

莊得洪武末爲西涼都指揮召至北平爲燕兵右  
翼出塞有功建文初隸宋忠麾下懷來之敗惟得  
一軍得全盛庸戰夾河得力戰助庸斬譚淵已而  
靖難兵勁騎乘暮掩擊得力戰死

都指揮陳質

陳質歷官江西都指揮使有威名建文初充叅將



守大同尋陞中府都督同知發代府陰事代簡王  
獲罪靖難兵出懷來質以西師助宋忠忠敗退守  
大同靖難後被執不屈 上曰質奸人害代王者  
遂被殺

都指揮楚智

楚智驍將也洪武中數從宋國公涼國公出塞有  
功歷陞都指揮使北平尋召入京從曹國公統騎  
卒遇靖難兵輒奮力戰夾河之後被執不屈死之

都指揮阜旗張

張阜旗者不知其名以都指揮充偏將力挽千斤

每遇戰靖難兵輒揮阜旗先登軍中呼爲阜旗張  
轉戰山東屢有俘馘至夾河力戰死猶執阜旗不  
仆北軍皆異之

指揮王資

王資不知始所自起以指揮從偏將防守淮北資  
有膂力善騎射靈璧之後率步卒護軍餉諸將兵  
敗輜重芻糧委棄狼籍不能獨完遂被執遣還京  
遂走鳳陽從徐知府防禦靖難後追罪廢死

指揮崇剛

崇剛揚州衛世指揮其使同知僉事不可考矣建



文初靖難兵起剛練兵繕濟城濠御史王彬倚任之兵至專以城守事屬剛晝夜不解甲同列懷貳心者忌剛畏彬不敢發及彬被執爲徐政所縛張本又素不喜剛剛亦不屈而死

### 指揮趙諒

趙諒鄂國公外孫其母與孝康皇后兄弟也壯勇知兵建文元年六月以諒爲留守右衛指揮僉事信任之諒能效職無私交未逾月靖難兵起諒時時奉密命往來諸將軍中督察之壬午秋常宗人並得罪諒亦坐廢憂懼卒

### 指揮宋瑄

宋瑄鄆國忠順公晟子也建文中爲府軍右衛指揮使數從諸將禦靖難兵有功靈璧之戰披甲躍馬先登斬首數級已而諸營兵敗瑄猶格鬪力屈死之靖難後晟功名大著封西寧侯卒永樂六年兵部上侯諸子孫名乞嗣封瑄子本晟長孫宜嗣上惡瑄令瑄弟琥嗣侯琥尚安成公主琥弟瑛尚咸寧公主琥罪廢瑛嗣侯沒於土木

### 指揮張倫

張倫河北諸衛指揮也勇悍負氣常喜觀古忠義



事建文元年十二月薊州衛官起兵攻北平不克  
死倫聞之發憤合兩衛官各率其兵南奔結盟報  
國初從景隆已而從盛庸有功靖難後死之

衛鎮撫曾濟

曾濟薊州衛鎮撫與馬宣守州城靖難兵攻之不  
能下招之降不肯輒出兵力戰兵敗爲張玉所執  
不屈死之

衛鎮撫楊本

楊本中牟人或曰處州人初爲太學生精於遁法  
建文元年十二月募才略之士本應募起家兵部

試之授錦衣衛鎮撫時吳王撫軍一日本請王出  
觀兵及登將臺見大水淼茫平階而一軍皆不見  
本曰此水遁也及帥師北向本常持一鐵棒重三  
十斤臨陣馳突北軍披靡不敢前遂破之景隆忌  
本不上其功已而本約日出戰諸軍爲後繼景隆  
謂諸將曰今日譬之一園瓜我輩種得熟乃被別  
人採去耶竟擁兵不救本上疏略曰刑屬三千罪  
莫大於不孝人倫有五德莫大於盡忠忘君虐民  
者不可以不懲喪師失律者不可以不罪今都督  
袁宇與耿炳文征討喪軍士二十萬於燕地 皇



上憐其爲 太祖故舊不忍加刑又如魏國公徐  
輝祖征燕私存姊妹之情虧喪士馬 皇上召回  
京師命大教場操練軍士又曹國公李景隆四月  
進兵喪失軍馬無限 皇上責問乃歸罪羣下此  
實總兵之罪也乞假臣爲大總兵用能官一員召  
募義勇招撫軍伍凡先鋒叅謀軍政稽考等官臣  
自當保舉仍特命親王爲監軍疾馳燕師則可免  
生民於塗炭奠宗社於泰山矣本遂帥孤軍獨出  
被擒繫北平獄後 文皇攻濟南失利趙王奔還  
北平恐人心動搖索本殺之 文皇大怒曰本有  
才略予且欲用本奈何殺之本頸後無髮力戰有  
功而爵賞不及

千戶倪諒

倪諒燕山左護衛千戶也上變告府中事府中官  
旗盡逮詔獄于諒周鐸皆伏誅沒產壯者戍瘴鄉  
幼者刺離間親王字克錦衣鞍轡局幼軍靖難後  
諒死之

所鎮撫周拱元

周拱元沅州人少讀兵書出入辰沅蠻中相交易  
蠻人信之建文元年應募入京試騎射答策授錦



衣所鎮撫軍前差遣占候輒中主將令引步兵防  
餉舟靖難後死

建文遜國臣記第二卷

子履準校

孫心材重校

建文遜國臣記第三卷

吾學編第五十四

禮部侍中黃觀

海鹽鄭曉

黃觀字瀾伯一字尚賓貴池人初從父贅姓許幼  
穎敏受學元黃皞皞死節觀益自砥礪嘗築翠微  
書舍讀書洪武二十四年會試禮部第一廷對禦  
戎策大要以天道福善禍淫之機人事練兵講武  
之法為言擢進士第一授官翰林復黃姓累陞尚  
寶卿禮部右侍郎建文中改侍中掌尚寶司事與  
方齊並見信用 文皇索齊黃時觀草詔極其詆



斥建文四年觀奉詔募兵上游且督諸郡勤王至  
安慶聞變痛哭謂人曰吾妻翁有志節必不辱招  
魂葬之江上明日家人自京奔至言翁夫人暨二  
女同被執有象奴得之索釵釧出市酒殺夫人急  
携二女率家屬十人投淮清橋下死觀慟哭至李  
陽河聞建文君避位朝服東向再拜投湍流中死  
籍其家并逮姻黨 仁宗初得釋柯暹爲觀傳秘  
不肯示人後三十年縣尹清江龔守愚於觀故址  
立祠祀之

吏部侍郎毛太

毛太不知何許人建文元年代王謙爲左侍郎蹇  
義爲右而統爲尚書太文章政事皆優所與交者  
並中朝俊彥靖難兵起數上封事條方略張統死  
太亦死或曰即毛大亨也

戶部侍郎卓敬

卓敬字惟恭瑞安人生質秀敏孝弟七歲嬉戲相  
工曰此兒骨髮殊異必爲名卿惜血不華色耳年  
十五讀書寶香山風雨夜歸迷失道得一兕牛馮  
之歸比入門乃黑虎也洪武二十一年進士除戶  
科給事中改元士尋又改爲士源又復爲給事中



時制度未備諸王服乘多僭敬乘間爲言 上曰  
爾言是朕慮不及此因陞宗人府經歷進戶部侍  
郎建文初燕王來朝敬密奏曰燕王智慮絕人酷  
類先帝夫北平者強幹之地金元所由興也宜徙  
燕封南昌以絕禍本夫萌而未動者幾也量時而  
爲者勢也勢非至勁莫能斷幾非至明莫能察建  
文君覽奏大驚袖之翼日語敬曰燕王骨肉至親  
卿何得及此曰楊廣隋文非父子邪建文君默然  
良久曰卿休矣事竟寢 文皇卽位責敬不奉迎  
乘輿敬厲聲不遜怒欲殺敬憐其才且繫獄或以

管仲魏徵事諷敬不聽姚廣孝惡敬必欲殺敬敬  
臨刑從容歎曰變起宗親略無經畫敬死有餘罪  
神色凜然經日猶如生夷三族 文皇嘗曰國家  
養士三十年惟得卓敬後四十年劉球傳其事私  
謚曰忠貞敬立朝慷慨英偉美丰姿善談論凡天  
文地理律曆兵刑皆能究察文詩峭拔磊落所著  
有詩文五十卷

戶部侍郎盧廻

盧廻浙江仙居人建文三年爲戶部侍郎廻踈爽  
不屑曲謹然大節皎然少喜飲酒飲酣輒長歌人



或謂廻狂旣仕顧折節恭慎靖難後不屈縛就刑  
長謳而死聞者悲之或曰盧珙

戶部侍郎郭任

郭任丹徒人或曰定遠人廉慎有吏才仕至戶部  
侍郎調兵食軍興不乏靖難兵入金川門任不屈  
死之子經亦坐死少子金山保戍廣西嘉靖中鎮  
江知府劉儲秀祀之鄉賢祠

禮部侍郎黃魁

黃魁不知何許人建文中爲禮部侍郎與陳迪黃  
觀共事魁行古雅有文學習與禮迪觀皆敬愛之

靖難初魁不屈死之

兵部侍郎陳植

陳植廬江人元舉河南鄉試不仕洪武間起爲吏  
部文選主事歷官兵部侍郎靖難兵至植受命督  
師江上有督將密議降者植責以大義督將恨之  
遂遇害督將率衆奉迎自陳邀賞 文皇立誅之  
具棺斂植遣官護喪葬於白石山植宗人大懼皆  
變姓名走匿無敢會葬者

兵部侍郎徐垕

徐垕字宗實黃巖人以字行聘授風紀官垕以草



茅愚屏辭銅陵簿謫淮陰驛丞郡邑士多所造就  
召見獎諭屢聘主文衡陞蘇州通判擢兵部右侍  
郎疏請移整風俗罷去不急振舉廢墜裁定賦稅  
撫輯農桑開政教之路塞異端之源進賢退不肖  
靖難兵起奉使招集兩浙義勇明年建文君遜位  
去屋家覆沒於京師屋義槩侃然杜門終老

刑部侍郎胡子昭

胡子昭字仲常一名子韶字伯尚大足人初名志  
高富經術性方介從學方孝孺漢中蜀獻王重子  
昭贈子昭詩以明經儒士薦爲榮縣訓導建文初

陞翰林檢討又陞山東按察僉事進刑部左侍郎  
建文四年九月死之臨刑詩曰兩間正氣歸泉壤  
一點丹心在帝鄉時年四十一父復初母郭皆年  
八十餘并其子五人給緝繼等皆謫戍正德中巡  
按御史熊相立祠祀之

御史大夫練子寧

練子寧名安以字行新淦人洪武十八年進士父  
伯尚洪武間爲起居注直言忤旨出爲廣德州同  
知遷臨汀鎮安二府通判子寧初從鄉長者竹庄  
先生游命賦水竹村居詩曰千山暮雨石泉通一



夜春雷籜龍長稍長與金少保相友善謂之曰異  
日子必爲良臣我必爲忠臣廷對言近日朝廷用  
人狗名而不求實小善驟進小過輒戮非育才用  
人之道剴切不顧忌諱 上親擢第二授翰林修  
撰未幾內艱杜門屏跡力行喪禮服闋復除翰林  
陞副都御史工部侍郎建文初即位改吏部與蹇  
義爲左右侍郎又改御史大夫景隆奸邪懷異志  
屢敗召還子寧執景隆於朝數其罪請誅之不聽  
憤激叩首言此賣國賊臣備員執法不能除奸請  
先伏誅遂罷朝靖難兵旣渡淮靖江府直史蕭用

道衡府紀善周是修上書論大計指斥用事者誤  
國書下廷臣及兩人議用事者怒詬二人子寧曰  
事已至此尚不能容言者乎詬者愧而止 文皇  
即位縛子寧至語不遜斷其舌曰吾欲效周公輔  
成王子寧手探舌血大書地上成王安在遂族其  
家姻戚逮戍邊者百五十一人越數年吉水錢習  
禮以未及逮爲鄉人所持恒懷不安以告楊榮榮  
乘間以聞 文皇欣然曰使練子寧尚在朕固當  
用之况習禮乎子寧所著詩文名金川玉屑集正  
德中江西提學副使李夢陽爲金川書院祠子寧



刊其集行於世

御史大夫景清

景清本耿姓真寧人洪武二十七年進士第二人  
倜儻尚大節領鄉薦遊國學時同舍生有秘書清  
求而不與固請約明旦即還書生旦往索曰吾不  
知何書亦未假書於汝生忿訟於祭酒清即持所  
假書往見曰此清燈窗所業書即誦徹卷祭酒問  
生生不能誦一詞祭酒叱生退清出即以書還生  
曰吾以子珍秘太甚特此相戲耳初清赴舉時過  
淳化主家有女爲妖所憑清宿其家是夜妖不至

去却復來女詰之曰避曰京秀才旦日女以告其父  
父追及清語之故清書景清在此四字令父歸粘  
於戶妖遂絕不至清試禮部第三錄詩書二經入  
翰林三載改監察御史三十年春召見嘉其才命  
署都察院左僉都御史與實俸是夏臺臣鄧文鑑  
劉觀及清奏事罷以疏事訛懷印入刑科更疏爲  
給事中劾下詔獄尋宥之出川陝巡察私茶建文  
即位擢左都御史改御史大夫 文皇繼統方孝  
孺練子寧等死而清獨委蛇侍朝人疑之一日早  
朝清緋衣入先是星者奏文曲犯帝座甚急 文



皇因疑清及朝清獨著緋遂收之得所帶劔詰責  
不屈而死是夕精英迭見族其家已而時入殿庭  
爲厲又命籍其鄉轉相攀染謂之瓜蔓抄村里爲  
墟

都御史茅大芳

茅大芳大興人博學能詩文少有奇名或贈之詩  
曰陸機此日能爲賦賈誼何時復註書洪武中儒  
士應辟典教淮南考績入朝 高廟召對悅之擢  
秦府長史勉以董子輔相之業賜賚甚寵大芳感  
激額其堂曰希董方孝孺爲記稱大芳志意偉然

敦大和雅不亢不諂深有得於正誼明道之旨建  
文君即位擢右副都御史靖難兵起遺詩淮南守  
將梅殷幽燕消息近如何聞道將軍志不磨縱有  
火龍翻地軸莫教鐵騎過天河關中事業蕭丞相  
塞上功勳馬伏波老我不才無補報西風一度一  
悲歌建文四年八月死之子順童道壽文生並論  
死二孫添孫歸生死獄中有希董集五卷行于世

都御史陳性善

陳性善名復初以字行山陰人洪武十八年進士  
上見性善疑重謂侍臣曰性善君子人授行人司



副入翰林爲檢討初誠意伯劉基卒命李鐸往取其遺書基子璉卽出觀象玩占石室中從鐸詣闕上之性善善楷書召入便殿繙錄 上威嚴進見者惶汗手顫不成字惟性善動止安雅書法端正上悅賜性善酒是時威譴叵測性善留竟日家人以爲死矣比出大驚喜久之超陞禮部左侍郎薦薛正言輩雲南布政使韓宜可隸謫籍性善薦起爲副都御史皇太孫在東宮時熟聞性善名及卽位一日退朝獨召性善賜坐問治天下之要且使手書以進性善感知遇盡所欲言朝廷悉從之然施行未竟輒爲有司所更性善請見曰陛下不以臣愚猥承顧問臣旣僭塵上聽許臣必行未幾輒改所謂爲法自戾何以信天下靖難兵起改性善爲副都御史監軍建文四年三月辛巳戰靈璧敗績與彭與明劉伯完王資皆被執 文皇縱之歸性善衣朝服躍入河死之後加追戮家徙邊已而赦還

大理少卿胡閏

胡閏字松友鄱陽人博學修行 高皇征陳友諒至鄱陽吳芮祠見壁間題竹幽人無俗懷寫此蒼



龍骨九天風雨來飛騰作靈物 高皇問祠中人  
此誰詩也對曰里墟中儒生胡閏立召閏見置帳  
前久之官督府經歷建文中以直諒知名遷右補  
缺尋進大理少卿靖難兵起數與齊黃議軍國事  
壬午七月不屈死之籍其家子傳道論死傳慶謫  
戍邊一女得釋歸貧甚無依鄉人競遺錢穀曰此  
忠臣女也旬日饒足嘉靖初提學副使邵銳祠之  
學宮

太常少卿盧原質

盧原質字希魯初名質寧海人父中母方孝孺姑

也洪武二十一年進士第三人授翰林編修孝孺  
遺原質詩曰奉天殿上榜初開共賀江南得秀才  
好與青蘿居士說今年文運屬天台二十三年外  
艱賜傳奔喪二十八年陞太常少卿事建文君屢  
有建白靖難後召見不屈死之族其家弟原朴

太常少卿廖昇

廖昇襄陽人不知其所以進學行最知名與方孝  
孺王紳輩友善洪武中爲左府斷事 上知其賢  
二十九年六月擢太常少卿建文元年正月勅修  
高皇實錄禮部左侍郎兼翰林學士董倫右侍郎



兼翰林學士王景彰爲總裁官昇及翰林侍講學士高巽志副總裁翰林修撰李貫國子博士王紳漢中府學教授胡子昭齊府審理副楊士奇崇仁學訓導羅恢馬龍他郎甸長官司吏目程本立等纂修官昇博雅有史才朗達負氣書靖難兵事語多撫實聞忠誠伯等自龍潭還慟哭與家人訣自縊死都御史陳瑛奏昇黃觀王叔英周是修王良顏伯瑋皆不順天命效死建文計其存心與叛逆等並宜追戮 上詔勿問

大理寺丞鄒瑾

鄒瑾吉安永豐人洪武二十七年遇金華王紳紳稱瑾志篤才敏議論磊落可喜忠義人也嘗遊成都都人士皆願與瑾交洪武末薦至京建文二年爲大理右寺丞靖難後不屈死之或曰四川江津人洪武中以經明行修薦起縣學教諭遷監察御史歷陞都御史死建文時

大理寺丞劉端

王高

劉端南昌人建文二年進士驟遷大理寺丞廉明執法靖難後與同邑王高並坐縱方孝孺息樹陰剗鼻而終高與端同年進士又與端同官或曰高



通國日誌 卷之三  
爲刑部郎中

大理寺丞彭與明

彭與明萬安人貢入太學洪武二十五年授兵科給事中陞刑部浙江司員外郎建文元年陞湖廣按察僉事尋陞大理右寺丞與明廉勤律已剛毅敢言敏達能斷四年擢中朝官知兵有風裁者出江北督察諸將與明爲衆所推遂出淮西至靈璧會何福戰敗爲北兵所執 文皇遣歸令傳語中朝士與明慚憤裂冠裳棄官變姓名

左拾遺戴德彝

戴德彝奉化人洪武二十七年進士第三人初爲翰林編修三十年與張信並陞侍讀 上諭曰汝爲侍臣凡國家政治得失生民利病當知無不言昔唐陸贄崔羣李絳在翰林皆能正言讜論補益當時汝宜以古人自期後改監察御史建文中省御史改左拾遺靖難兵起與方黃畫兵事靖難後不屈死之

建文遜國臣記第三卷

子履準校

孫心材重校



建文遜國臣記第四卷

吾學編第五十五

海鹽鄭曉

開國公常昇

常昇開平王仲子也兄茂洪武三年以父功封鄭國公二年從宋國公馮勝出塞征納哈出茂本勝婿勝言茂驚潰納哈出衆降人械送京師茂亦言勝短上召勝還奪總兵印罷朝請茂安置龍州上念開平王功二十一年封昇開國公懿敬皇大子妃昇姊也靖難兵至浦子口昇及魏國公分道出戰衆散金川門失守昇見文皇得不死昇子



繼祖坐事謫雲南臨安永樂二年召至京賞鈔幣  
遣歸謫所繼祖六子長寧寧子復弘治五年詔錄  
太廟元祀功臣後復得爲南京錦衣衛世指揮使  
卒子經嗣老子鳳卒子玄振嗣嘉靖十年進劉基  
侑享太廟并議常李鄧湯四王後十一年續封玄  
振懷遠侯

越雋侯俞通淵

俞通淵父河間郡公廷玉兄號國忠烈公通海南  
安侯通源通淵以父兄故充參將侍舍人從大將  
軍征秦隴燕趙功陞督府僉事征哈刺哈至捕魚

兒海獲酋長人畜尋轉餉江西充偏將征都勻龍  
場諸蠻克辰沅寶慶俘獲多封越雋侯統兵討建  
昌叛賊城越雋二十六年坐累奪侯還鄉建文元  
年召見 上壯之曰老將也授豹韜衛指揮使充  
偏將從大將軍禦靖難兵敢戰有功白溝河之後  
諸將兵大敗通淵遂歿於陣子翊先卒次靖嗣官  
二年卒次端又明年優給錦衣未幾卒靖難後家  
人懼禍不敢言襲替事建文時諸將校多失世官  
也

駙馬都尉梅敷



梅殷歸德人汝南侯思祖從子洪武十一年尚寧國公主爲駙馬都尉恭謹有謀能騎射諸駙馬中高皇尤愛殷嘗受密命輔建文君靖難兵起殷充總兵官鎮守淮安悉心防禦 文皇假道殷割使人耳鼻口授詞答 文皇曰留汝口與殿下言君父恩義 文皇竟不得道淮安乃渡泗水破盱眙出六合至京師即帝位殷尚擁重兵淮上 上迫公主招殷公主嚙指血爲書付李中使至殷殷得書慟哭詢建文君所在中使曰去矣殷曰君存與存君亡與亡吾姑忍俟之乃還京見 上上曰駙

馬勞苦曰勞而無功永樂二年冬都御史陳瑛言殷招藏亡命私匿胡人與女秀才劉氏朋邪詛說幾得罪明年冬入朝殷讐家都督譚深指揮趙曦令人擠殷死笄橋下曦又誣殷自投水死都督許成發其事 上怒罪深曦二人對曰此 上命也奈何殺臣 上大怒立命力士持金瓜落二人齒斬之謚殷榮定初公主謂 上果殺殷牽衣大哭問駙馬安在 上笑曰爲公主踪跡賊無自苦公主謹護二子順昌景福 上以順昌爲中府都督景福指揮旗手衛僉事賜手書二甥曰朕不念爾



母爾安得至今日二甥後改孝陵衛指揮使宣德中與世襲孫純舉進士爲中都副留守或曰公主嘗貽書阻靖難兵 文皇不答兵至淮北與公主書言興師不得已故令遷居太平門外勿罹兵禍公主亦不答公主 高皇后長女后二女次適歐陽倫倫犯茶馬禁死

### 長興侯耿炳文

耿炳文濠人父君用取滁和積功爲管軍總管克采石取金陵丙申與士誠戰賈勇先登死炳文代領其軍明年取廣德長興擒士誠守將降其兵會

立元帥府長興以炳文爲總兵都元帥辛丑敗士誠將李伯昇追斬五千餘級拜指揮使吳元年破蘇州陞大都督府僉事洪武初授鎮國上將軍兼右率府副使二年陝西鎮守三年授秦王府左相兼陝西行省右丞封長興侯食祿千五百石與世券十四年破虜北黃河復還陝西二十四年賜鏹鈔造第鳳陽葺先塋贈君用爲侯二十五年兩當妖人作亂總兵討三年平之三十年克征西將軍勦平蜀盜三十一年鎮守遼東建文元年靖難兵起炳文爲征虜大將軍率衆二十萬北進至真定



都督徐凱兵十萬駐河間都督潘忠楊松營鄭州  
先鋒至雄縣 文皇出炳文不虞破其城忠松引  
衆來援伏兵起忠等皆被執因得炳文虛實遂長  
驅至真定張玉朱能譚淵來戰炳文大敗奔還滹  
沱河東炳文衆尚數萬復戰衆皆潰降副將駙馬  
李堅都督甯忠顧成都指揮劉遂俱被執炳文固  
守真定靖難兵攻城二日不能下而去炳文老將  
善戰至是敗建文君始有憂色召還遣李景隆代  
炳文竟至於亡永樂二年刑部尚書鄭賜左都御  
史陳瑛劾炳文衣服器皿僭飾龍鳳玉帶僭丹韞  
卒洪熙初盡以長興侯田舍賜留守郭鑑云子璿  
璿別有傳瑄散騎舍人擢尚寶卿後皆獲罪死

駙馬都尉耿璿

耿璿長興侯之子洪武中爲前軍都督僉事尚懿  
文太子長女江都郡主建文元年郡主進封公主  
璿爲駙馬都尉掌前府事璿勇悍有武略靖難兵  
起以王室懿親得預聞兵事炳文北行璿力勸直  
搗北平已而炳文戰數敗璿怏怏抱病時對公主  
悲泣建文君遂去杜門稱疾竟坐罪死公主復稱



郡主永樂元年春憂卒

灤城侯李堅

李堅武涉人父英開國有功爲驍騎右衛指揮僉事力戰死烏撒贈指揮使堅尚 太祖第七女大名公主爲駙馬都尉嘗與駙馬歐陽倫梅殷陸賢賑濟北平建文君即位進公主大長公主堅素負才勇克左副將軍從長興侯北進遇靖難兵諸將謹備西北靖難兵突擊出不意破西南長興侯大敗靖難將丘福又攻子城堅出接戰互有勝負封堅灤城侯食祿千五百石與世券已而兵敗滹沱

河薛祿引槊中堅墜馬祿揮刀直取堅堅大呼我李駙馬勿殺祿擒堅見 成祖成祖謂爾至親今至此奈何械送北平道卒子莊以公主故特宥當嗣公主懼禍繳誥券莊流寓南京詩酒終其身公主至宣德初卒或曰堅子莊嗣侯謚威壯弟成爲中都留守改山東都指揮成子陞世南京衛指揮使祿後封陽武侯

安陸侯吳傑

吳傑黔國威襄公子也洪武十八年傑以指揮嗣封安陸侯屢出山陝河南北平練兵從征胡二十



七年練兵浙江防倭二十八年有罪令與吳高皆從楊文征龍州立功自贖建文中率師援真定失律喪師謫南寧衛指揮使永樂元年子璟乞嗣正統間再三乞皆不許弘治六年璟孫鐸援詔乞嗣亦不許

### 歷城侯盛庸

盛庸不知何許人靖難兵起克參將從長興侯數失利長興侯召還庸又從曹國公轉戰燕齊間互有勝負建文二年七月鐵鉉守濟南靖難兵圍急庸夜出劫戰晝憑城禦防盡毀靖難諸攻具捷聞

卽軍中陞鉉兵部尚書封庸歷城侯食祿千石克平燕將軍總兵官代曹國公鉉參贊軍務是年十二月戰東昌殺張玉三年三月大戰于夾河殺譚淵再戰敗走德州欲搗北平靖難兵長驅至淮上四年春夏間庸南趨靈璧齊眉山戰皆敗次於淮南六月靖難兵至浦口庸出高資港又戰敗靖難後勅庸曰比以山東未定命卿鎮守淮安今鐵鉉就獲諸郡悉平朕念山東久困兵革憊於轉輸卿宜輯兵養民以稱朕意永樂元年致仕千戶王欽發庸罪狀陞欽指揮同知賞銀百兩未幾都御史



陳瑛劾庸口出怨言懷異圖請誅庸遂削爵庸暴卒今英國公新寧伯即玉淵後也

江陰侯吳高

吳高父良開國有功封江陰侯卒贈謚江國襄烈公高歷官前軍署都督僉事洪武十七年嗣侯屢出山陝北平河南練兵從征胡二十八年有罪調征趙宗壽靖難兵起高總兵守遼東與楊文數以遼東兵攻永平 文皇曰高雖怯行事差密文勇而無謀去高文不足慮也遣人遺二人書盛譽高極詆文故易其函投二人所二人得書並聞建文

若竟疑高削爵徙廣西獨命文守遼東竟敗靖難後召高鎮守大同高上言禦虜方略永樂十二年被劾編氓江陰十七年奪券洪熙元年 上曰高往年多行無禮謫戍海南高即死徙其家會赦得釋宣德十年子昇乞嗣不許

都督耿璫

耿璫長興侯仲子累官至後軍都督僉事靖難兵起與江陰侯吳高及楊文率遼東兵圍永平不克退保山海關吳高被間奪兵徙廣西楊文守遼東璫數請攻永平以動北平文不聽靖難後璫論死



都督劉貞

劉貞合肥人開國功累陞左軍都督充大寧總兵官修懷來城池改左軍靖難兵起貞及陳亨卜萬引大寧軍出松亭關營沙河欲復遵化亨有貳心文皇入大寧盡握其軍以行遂入松亭關貞夜負勅印浮海歸時建文君聞行北平諸將降 文皇籍貞家下獄俄貞由海道出福建還京詔釋其家靖難後陞左都督鎮遼東恒懷愧憤永樂元年卒貞長女 文皇昭順德妃也以故得免於禍次女伊王妃

都督趙清

趙清鳳陽人有膂力善用兵洪武中積功官至北平都指揮使陞後軍都督僉事致仕清去北平時常懷隱憂不敢言靖難兵起黃齊諸人薦清帥河南兵守彰德靖難兵至城下遣人招清清對使人曰殿下至京城但出片紙召清清不敢不至今爲朝廷守封疆不敢棄命失職靖難後召清還清遂乞閑不許

都督楊文

楊文倉山人甲辰領神鎗從征功陞右軍都督僉



事世指揮使二十七年克總兵率舟師鎮守太倉  
仍督浙江海船召掌中都留守克總兵率十五萬  
人征廣西築城設奉議南丹潯州慶遠四軍民指  
揮使司三十年遼東練軍屯田克總兵征虜前將  
軍率京師湖廣江西兵征五開擒殺蠻賊建文初  
克總兵部署大寧兵及寧府護軍屯開平靖難兵  
起宋忠敗文移守遼左吳高時出兵擾北平吳高  
削爵徙廣西文專領遼東建文三年冬文引兵萬  
餘掠薊州殺戮極慘遇劉江兵戰敗指揮王雄七  
十一人皆被執靖難後召文還憐其開國老將得

不死永樂四年卒世羽林右衛指揮使

都督徐凱

徐凱合肥人開國功爲茂州衛指揮使守松潘累  
立戰功洪武二十六年出掌鹽井衛事征賈哈刺  
有功又從西平侯沐春討刁幹孟歷陞都督僉事  
鎮守四川階文官軍叛會都督寧正討平之又克  
征虜大將軍從沐春討刁幹孟有功建文元年從  
大將何福征百夷爲副總兵靖難兵起從宋忠北  
進練兵臨清二年十月吳傑平安守定州盛庸守  
德州凱及陶銘城滄州爲犄角 文皇自通州直



趨滄州凱大戰不勝入城東門之卒先潰凱及都督程暹都指揮俞琪趙濟胡原李英張傑將校百餘人皆被執 文皇飲凱等酒遣歸凱等謝願留事殿下遣至北平仍其官祿靖難後暴卒建文數年間諸將被執者無慮千人已卯懷來之戰都指揮俞瑱真定之戰都指揮劉璲庚辰白溝河之戰都指揮何清滄州之戰暹琪濟原英傑德州之掠千戶蘇瓛辛巳滹沱河之戰指揮鄧戩陳鵬真定之圍都指揮朱榮定州之戰都指揮花英鄭琦王恭指揮詹忠壬午渡衡水指揮賈榮拔東平指揮

詹璟拔汶上都指揮薛鵬渦河之戰胡騎都指揮林帖木兒火耳灰哈三帖木兒婁鬼里淮河之戰守將丁良朱彬指揮王貴等一百八十餘人  
建文遜國臣記第四卷

子履準校

孫心材重校







